

Հիմնուելով վերոյիշեալ մտախոհութիւնների վրայ, Կարոյի եւ իր ընկերների նպատակը ինձ երեւում էր բոլորովին երեւակայական, եւ ես խիստ ափսոսում էի, որ նրանք ընկած էին այնպիսի անելանելի մոլորութեան մէջ...

Ես միայն չէի, որ այսպէս էի մտածում, բոլոր ժողովուրդը այսպէս էր մտածում, որովհետեւ նրանք նոյնպիսի տեր թողիկների աշակերտներ էին, որպէս ես:

Եւ Կարօն աշխատում էր մի այսպիսի նախապաշարուած ժողովրդի բարօրութեան համար...

### ԻԱ. ՆԱԽԱԳՈՒՇԱԿՈՒԹԻՒՆ

Արեգակն սկսել էր արդէն այրել. կեսօրոյ տօթից դժարանում էր մարդի շնչառութիւնը: Բաժանուելով Զասօից, ես գնում էի մի նեղ շաւիղով, որ տանում էր դէպի փոքրիկ վտակը ձորի մէջ. այնտեղ արծաթափայլ ջրի կանաչ ափերը հովանաւորում էին մի խումբ ծառեր, որոնք տարածել էին իրանց ստոերը մետաքսի պէս փափուկ խոտերի վրայ: Ես շտապեցի այնտեղ փոքր-ինչ ազատ շունչ քաշել: Ծառերը նոհրական էին մի փոքրիկ մատուռի, որի կիսաւեր փլատակները դեռ վայելում էին իրանց սրբազնական յարգանքը բարեպաշտ ժողովրդից: Մատուռի մի քանի ողջ մնացած կամարները, որոնք ազատուել էին ժամանակի մաշող ձեռքից, թաքնուել էին, միմեանց հետ խիտ փաթաթած թուփերի եւ մացառների մէջ, իսկ նոհրական ծառերը բարձր տարածուելով իրանց ազատ ճիւղերը, գրկել էին իրանց ծոցում այն հինաւուրց սրբարանը:

Ծառերից մի քանիսի ճիւղերի վրայ փաթաթած էին գոյնզգոյն թելեր եւ շորերի կտորտանքներ: Տատս վաղուց մեկնել էր ինձ այսպիսի ծառերի նշանակութիւնը. նա ասում էր՝ «երբ սուրբ ծառի ճիւղին մարդ կապում է իր հագուստից մի կտոր, իր բոլոր ցաւերը անցնում են այն ծառի վրայ»: Իմ սիրտն էլ լի էր ցաւերով... Ես էլ տանջւում էի տխուր եւ հոգեմաշ զգացմունքներով... չթէթեւացնե՞լ արդեօք այս անախորժ բեռը...: Ես դուրս քաշեցի իմ արխալուղի կալածքից մի թել եւ դողդոջուն ձեռքերով կապեցի նոհրական ծառի ճիւղին:

— Այս բաւական չէ՛, — լսելի եղաւ մի ձայն:

Ես սոսկացի. տեսնում եմ նոյն ծառի բունի ետեւ կծկուել է մի կին: Սատանան իր բոլոր հրեշաւոր այլանդակութեամբ չէր կարող այնքան զարհուրելի լինել, որպէս այն մռայլոտ կերպարանքը: